

重修兩淮鹽法志

兩淮鹽法志卷一百四十九

捐輸門

捐收票本

自洋商與我爭利東南百貨動輒折耗惟淮鹽恃有定章無虞虧本輾轉喧傳票價虛漲計臣因議按年籌捐名爲票本其實淮商迭輸大捐先後二百數十萬與已繳票費無異若復散環章責令常捐旣奪其已操之券復竭其不涸之源銷暢固力不能勝銷滯則賠可立待勢必無人辨運釐課常懸鹽臣酌盈劑虛改爲籌捐一次巨款仍令照章循環寬恤於目前正所以備緩急於

異日可謂於餉項商情兩有裨益者矣志捐收票本

光緒六年正月戶部奏時事艱難籌備餉需擬捐收兩淮票本溯自道光年間經前任兩江督臣陶澍陸建瀛先後奏改票章原定先課後鹽按年驗資掣籤輪流認運立法甚當迨江楚軍興淮引不行至同治三年前大學士兩江督臣曾國藩克復金陵議復票運維時江淮閒戶口蕭條富商絕少曾國藩設法招徠但有投名領票者概准認運其後於修築清水潭案內經曾國藩飭令各商按一票捐工費銀四百兩一票者五百引也當時定章凡捐過工費者爲舊商從此按年准其循環轉運

更不許新商入茲聞鄂湘等岸每淮票一張轉相售
賣其始價值銀五六千兩迄今每票售銀至萬餘兩卽
僅租運一年亦值租價千金是見在淮商始以不費一
錢而得票繼亦僅繳過捐項四百兩而論票價則每張
所值萬金暫租亦一千餘兩且據爲子孫之世業獲利
奚啻倍蓰查淮鹽舊章引商則准世守爲業今旣改引
爲票盡人皆可認運不必商循族世之所繫也茲雖名
爲票鹽實與引商無異一經認運世世得擅其利是使
大利盡歸於商而司鹺政者反不得操進退盈縮之權
殊非權鹽正辦且與改票初章尤覺不符臣等以爲票

商應以一年一運爲斷每年每票除預繳正雜課釐外
仍令按年捐銀一次作爲票本分上中下三則上則捐
銀一千兩中則捐銀八百兩下則捐銀六百兩合兩淮
見銷四十萬引計算每年約可捐銀五六十萬兩應請
旨飭下兩江督臣督飭運司查明淮南北各口岸鹽銷暢滯
票價低昂情形酌定上中下則分別捐銀數目限一月
內專摺奏報一面傳集各商剴切曉諭儘見還票兩藉
詞推諉亦無庸強以所難卽飭運司另招新商接辦仍
復驗資掣籤之舊利之所在自無不踴躍輸將至前項
銀兩應由兩淮運庫專款存儲按半年一次批解部庫

外省無論何項要需不准動用

光緒六年三月署運司徐文達詳據淮南總局稟飭據淮南各商呈稱兩淮票運始則招徠認運繼則奏定循環正課釐金較舊時報部正雜課項爲重商等照章輸繳迨同治五年遵繳清水潭隄工銀四十三萬六千兩有奇十年遵繳直隸賑濟棉衣捐銀二十三萬兩十三年遵繳黃河工賑捐銀四十一萬一千兩有奇近如閩豫各省災賑又遵捐銀十四萬數千兩有奇供億之款幾乎無歲無之除淮北所捐不計外淮南先後共捐銀百數十萬兩無非取諸成本成本愈重獲利愈微此一定

不易之理商等托業其中餘利有無轉覺無從計及祇恃引票爲世守循環爲定章勉應一時緩急之需可望後日盈餘之補是以正供而外無不盡力認捐此商等得票以來厯捐鉅款每票不止清水潭之捐之實在情形也今奉部議籌捐兩淮票本何敢稍存推諉惟按年分則繳捐商力實有未逮爰集眾商公同籌議統淮南北擬報効銀一百萬兩以繳清爲率除淮北認捐銀十五萬兩外所有淮南共認捐銀八十五萬兩擬先與淮北通力合作設法籌措銀四十萬兩聽候轉詳奏准分批呈繳淮南應派先繳銀三十四萬兩下餘應繳銀五

十一萬兩仍按票分綱繳清爲止俾商等票仍執守運
按循環等情又據海分司飭據淮北各商呈稱頻年北
漕情形遠不如前成本日重利息愈微自有之票獲利
不及一分租票之家其利更減至於票價本屬虛而不
實並無一定其所以喧傳居奇者實因南北絲茶餅豆
經營動輒虧折惟此漕業恃有官章尙有蠅利可圖票
價之昂實由於此而推考其實買賣絕少近有飭捐之
議票價卽曰陡落並無買戶在商人票皆有本不能不
恃票本二字爲維繫其實未可恃也此次奉文飭捐應
隨同南商照餘利多寡核定以昭公允應請轉稟俟淮

南四岸運商捐數稟認核定淮北應捐若干卽求酌定
批飭遵行如期呈繳但求免其常年捐輸俾得以盈補
絀等情本署司查淮鹺至道光年間綱法敗壞已極於
是改行票運肅清以後重整鹺規一切章程悉仍票法
之舊惟行之日久亦不能無弊於是歷任前憲改爲循
環轉運所謂循環者係爲票鹽立法以杜弊初非票商
壟斷以求利也不知者見票鹽之獲利而又得循環世
守遂目爲無本之業其實每大票鹽五百引小票鹽百
二十引商人於買運價本外應納課釐皆有定額不能
絲毫短少且自奉准循環以後各商於課釐之外捐工

捐賑先後已報效過銀二百十數萬兩有案可稽其所
以疊輸巨資而無所諉卸者利則循去環來盈絀可以
通計而票價之所以昂貴亦賴此循環之法有以鼓動
人心更因有疊次捐資成本不無加重並非票鹽一事
別操奇贏近來絲茶百貨經營獲利者什之一二虧折
者什之七八洋商爭利華民每多束手惟僅此淮鹽恃
有一定奏明官章利雖日薄尙不至於折本華洋有銀
之戶權衡無術不勝垂涎祇以票有定額無歇業之人
卽無可買之票雖懸重價無引可得人情於難獲之事
想望每覺無窮輾轉喧騰票價雖無所底止細加推究

買賣皆無其人近議捐票本遂無價可論是票價之虛而不實其理顯而易明若一旦竟易以按年掣籤則所謂每票萬餘金者直可立歸烏有蓋鹽之利繫乎法鹽非法不能行法不善卽不能招徠也票鹽如不准循環按年再加以常捐決無新商問津必如部文內所云驗資掣籤盡人皆可認運第恐散漫無稽有實在身家殷實者卽有憑空挪移取巧者甚至錢店貸重息以居奇富家出所有以牟利究之得票者資非已有挾資者籤掣無名種種弊端不可勝述必致官商皆困敗壞而後已曾文正公因時制宜定爲循環轉運旦有不派捐不

增引之約雖爲淮商圖經久之利實爲榷政籌不敝之
規其間如有承運不力貽誤課釐者票可立時註銷權
仍操之在上是循環之道寓綱於票最爲意美法良淮
鹽自行此制遞年課釐無絀各商捐助鉅款綜計已得
前數未始非臧富於商之效溯查軍興以前鹽務極盛
之時綱商遇事報效亦不過湊集鉅資今昔情形奚啻
倍蓰目下邊防吃緊淮商縱力薄利輕而大義所在該
商等自不容稍存膜視惟以一時籌餉之艱遽令於輸
課輸釐之外復捐數十萬之鉅款按年按引責繳竟與
課釐同徵銷暢固力不能勝銷滯更踣可立待竭澤而

漁古有明戒當此東南財匱之時貿易艱難厚生無計是宜加意培養留此不涸之源寬恤於目前正所以備緩急於異日此又默體大局情形不得不爲淮商請命維此大局者也通盤籌議總以有裨餉項不竭商力爲要義連日集商公同籌酌各商人擬淮南北共報效銀一百萬兩祇捐一次求免常年並據各商以捐銀一時難湊稟請由各岸按引帶繳復經再三開導諭令先繳見銀四十萬兩其餘六十萬陸續呈繳節據金運判等及張署運判分別稟據各商認捐籌辦前來本署司詳加察核南北商人以常年報捐力有不逮茲擬捐銀一

百萬兩委係奮勉急公不遺餘力實已無可再增查食
岸商人近年銷暢自應一體飭捐淮南四岸運商原請
捐銀八十五萬兩應減去一萬兩捐銀八十四萬兩淮
北票販應捐銀十四萬兩淮南北食岸商人捐銀二萬
兩仍符一百萬兩整數均令先繳四成其餘六成陸續
呈繳聽候撥用應請覆奏時照案陳明仍舊永遠循環
以安商業又稟自同治初年江路肅清淮鹺復業至於
今日未復舊規而票價遽有萬金之說者祇以富商大
賈固集居奇無非圖利乃各國通商以後輪船通行信
息既靈運貨亦速凡業絲茶等項者虧折頻仍惟鹽商

恃有官定章程獲利較有把握是以有票者視之不啻
萬金而無票者慕之亦不啻萬金且在有票者不特視
若萬金卽予以萬金而不賣蓋不願得萬金而失世守
之業也在無票者雖慕若萬金亦不肯舍萬金而買一
票以成本重而無利可圖也部議三等票本銀數固難
強所不能卽使減而又減責令常捐在暢銷之年或可
強支儻遇稍滯之歲力斷不逮迨夫商疲財盡不特票
本無從徵收有名無實將每年數百萬釐課勢必因之
竭蹶渙散堪虞不可不深長思也夫鹽務之興也本輕
而利厚其敝也本重而利微歷觀成事理有不誣今票

本甫議收捐人心惶惑票價虛聲頓減良以成本遽增
餘利無幾儻致各商輕棄其業旁觀畏出其途富家財
貨無可流通似非維繫商情善保富強之至計本署司
審思藏富於民之義深維向來辦法之宜體察兩淮暨
食岸商利之厚薄諭令其捐一次合成百萬分起完繳
許以永保循環實緣

國用方殷鉅款旣得迅集而各商自清水潭報捐之後陸
續捐輸已形疲竭必須培養數年俾得藉手轉輸漸增
富厚是稍紓其力卽以浚挹注之源而爲他日借資之
地也又查部議修築清水潭案內凡捐過工費者爲舊

商按年准其環運等因此就清水潭一案言之厥後直隸賑捐棉衣黃河工賑閩豫晉三省賑需統其二百數十萬接踵以至商力曾未稍蘇惟恃有循環永業斯得併數年餘潤前後剜補以供輸將是則爲

國用備緩急更不得不保循環至名爲票鹽無異引商以迹求之誠有如部議所云者特票商違誤立予註銷權操自上與根窩由商把持者事實懸殊再行費一項爲數較鉅庫款不支應俟奉批後再行分飭酌繳經署鹽政吳元炳批常年捐輸力有未逮均係實在情形當於摺內切實聲敘並請永遠循環以保大局見銀四十萬

務限一月繳清具報分批解部其餘六十萬兩當此邊
防需餉孔殷勢難延緩亦應分岸酌定數目淮南由督
銷局淮北由錢糧局按引核收以期迅速而免虛懸

光緒六年三月署運司徐文達稟據淮南食岸商人乙和
祥等稟稱總局暨籌銷委員傳諭奉部飭捐淮南票本
一案淮南北食岸亦應一律捐輸等因理宜靜候憲諭
何敢冒瀆惟是食岸情形與綱岸票運不同綱票循環
轉運上綱銷竣接運下綱並無包完課釐之責食岸專
商認運按年包課且有按季包釐者銷暢額足固不可
必一遇銷滯額缺所短課釐必須照額賠繳不容帶欠

此責任不同者一也票商運鹽歸局凡一切銷鹽緝私等事悉由官爲經理商人並不過問食岸銷鹽全賴緝私嚴緊所需經費均係商人籌備每歲非累萬盈千不足以資得力此公費不同者二也票運到岸祇派一二夥友守輪領價並無岸用名目食岸正分各店多則二三十處少則亦七八處辛資店用積少成多歲需甚鉅此外尙有一切雜用之款不在其內此岸用不同者三也票商成本餘利載在刊章各有一定之數運出一票之鹽卽有一票之利食岸指買場鹽以及緝私店用年來無不倍加已覺支持不易若再遇滯銷之年包賠釐

課非獨無利可沾抑且有虧成本此本利不同者四也
追溯從前鹽務盛時每逢派捐公需向不攤諸食岸無
非因綱食賣價餘利多寡懸殊食岸價賤利微不得不
格外體恤起見是綱食攸分本有成規可考此次飭捐
票本係專指票商而言食岸認商既無引票自不在派
捐之列惟有各顧分內之公不缺額引之款暗寓報效
於包完釐課之中似與常年捐輸無異伏乞免予捐派
以恤商艱再淮北食岸係通綱票販兼認與商等專認
有間等情仰祈示遵經鹽政吳元炳批循環各商果遵
部議籌捐票本各食岸並無引票自不在捐派之列見

因票本按年常捐商力實有未逮改爲衆商報效一次銀一百萬兩食岸未便獨異溯查同治十年直省災賑籌捐棉衣十三年山東河工各食岸均亦一律報捐有案河工按引八錢捐數尤重此次僅據該司稟派二萬兩已屬體恤各食岸近年大半溢銷獲利較厚卽核定數目分限飭繳

光緒六年三月湖南督銷局署鹽法道陳寶善道員裴蔭森詳據湘岸淮商怡豐和等稟稱淮鹺領票運行前督憲定章循環按綱接運溯自開辦以來每綱認捐除代場商預繳錢糧關稅暗賠月息外其在場繳各捐僂指

幾及二十款合計每票額捐約六百餘兩而尋常派費
尙在所不計商等未嘗敢有推諉者亦爲其利本

國家分給齊民以公濟公自應爾爾茲奉部議捐收票本
爲數甚鉅而又按綱遞收以捐事紛繁之區商情艱難
之會一旦遽加鉅款實苦力不能支且紬繹大部奏議
其捐收票本亦仍權衡岸情分以上中下三則爲之重
輕報捐之法自歸淮南北各商會議湘岸情形有不能
與他岸一律相視者一湘省去淮二千餘里程途較他
岸爲遠費用亦較他岸爲多長常兩府所食淮鹽州縣
皆在洞庭以南濱湖一帶路路與川私相通而湘潭以

上則又處處爲粵私所逼勢非多設分局分卡不行同
治十二年以前歲銷只五六萬引迭經籌添費用官商
協力設法巡緝銷數始多故前沈督憲曾有湘岸商情
聯絡較他岸爲優捐款繁多亦較他岸爲勝之語籌費
多則餘息日少是目前之利不能如他岸也一循環定
引爲十四萬二千已與道光年間全省老額所差只四
千餘引近年設法疏售銷及十一二萬大半皆由人力
得來似亦盡地之利不比各岸引數少於老額認真巡
緝必可多銷現今固見暢行保無異日疲滯是將來之
利不能如他岸之有可恃也一湘岸遠涉重湖向多舨

價而辰州及湘鄉各處灘河險阻若非自行撥往則盡
食鄰私而每票撥費既須五六百千兼之起撥拋灑尤
甚約計運往一票短少餘利五六百金而各商頗苦派
撥是暗耗之利不能如他岸之無偏枯也一湘岸票值
向亦賤於他岸從未售及萬金光緒四年以前常售五
六千金至多亦不出七千之數去年其值蜂起每票售
至八千餘金抑亦至此而極運商饒春曉與周桃溪因
票涉訟經官斷結以票作八千五百金其價尙爲情加
之舉詳案確稽至目前時值又已大減是以票值而論
湘岸亦甚不及他岸也一湘商地處邊岸費用浩繁各

大憲每於籌捐派費酌減二三成如清水潭一案各岸出費四百金湘岸則只派二百五十兩他如晉捐等款亦無不少有等差是以大憲派捐向例而論湘岸亦本減於他岸也更有呈者湘省開岸之初多屬本省商人承辦繼以程途寫遠照應不支虧累之事層見迭出因此棄而他貿者固不乏人卽倒閉歇業者亦所在多有近年承運之商大半籍隸外省其票旣由價購得來已自先有票本今復驟捐鉅數商力未免難勝籲懇轉詳恩予酌減歸入下則量情定捐以甦商困等情查此案先後接准湖南藩司暨兩淮運使咨會到局此項票捕

仍係大部籌備餉需要款凡在運商食德有年自當竭力以圖報効惟是岸情商力屈伸原有不齊茲閱該商等所稱均係實在情形經鹽政吳元炳批准以票本歸下則

光緒六年三月署鹽政吳元炳奏戶部議捐兩淮票本一案臣督同署運使徐文達札調海州分司等集商妥議參考昔日之成規體察目前之岸務按年捐助商力實有未逮其中窒礙之處有不能不覲縷直陳者東南百貨經營以絲茶爲大宗近年動輒虧折惟兩淮鹺業恪守曾國藩奏定新章行之近二十年獲利較有把握有

票者恃循環爲恆業無票者欲攬入而無從人情所難
獲之事想望每覺無窮輾轉喧傳票價遂無底止致有
淮票一張價值萬餘兩之說細加推究前數年尙多更
名之商近則價愈昂愈爲可居之奇貨非特無人願賣
亦無人願買票價之昂已屬虛而非實自聞按年捐銀
之議本重利微商情疑慮票價必落恐漸至一文不值
也溯查道光末年票法之壞在跌價搶售曾國藩鑒前
事之失在各岸設立督銷局整輪保價至今堅守不搖
每鹽一船到岸守輪至速亦須十個月或一年以上方
能出售一遇滯銷或年平或兩年數年以前鄰私暢行

兩楚之鹽竟有守至兩年半以上雖住月倉租辛工
耗在在加增而從未有越輪而售者良以暢年之有餘
補滯年之不足通盤勻計利雖薄而本不虧今各岸銷
市暢滯靡常一旦責以常捐則一年擬捐千兩者守至
兩年捐已加倍萬一守愈久而捐愈重向之恃爲衣食
之資者不且遺身家之累乎議者謂淮商不費一錢世
擅其利與改票初章不符殊不知設局給票爲時甚暫
同治四五年間李鴻章署兩江督篆時請運已旺行票
不能徧給遂商諸曾國藩參綱法於票法之中刊頒淮
南循環章程厥後馬新貽踵行於淮北彼時票價尙不

甚昂新商往往備本買票稟請更名十數年來始挾重資而來旋獲厚利而去者不乏其人目前辦運各商大率出過票本者居多與初行票時情形本不相同現南北捐輸不一而足自小邏堡工需山東直隸而本省而閩省而山西河工災賑共計捐過銀二百十三萬二千六百兩有奇或請獎或不請獎無非出自商資不僅修築清水潭一項人所共知其商情能如此踴躍者亦賴循環之法有以鼓勵人心倘一朝墮此良法轉不足示大信議者又謂改驗資掣簽舊商卽散新商自無不樂從殊不知驗資之法從前陶澍陸建瀛皆係不得已而

出此曾國藩亦曾試行而軍興以後市情大非昔比一
聞驗資之信類皆不惜重息多方告貸自上海以達漢
口銀路頓然壅閉掣動數省幾至罷市而局卡所收之
銀官庫長存之款亦不免私挪上兌甚至營弁洋商從
而生心得票者資非已有挾資者籤掣無名流弊不可
窮詰曾國藩始與李鴻章毅然變計豈無所見而改絃
易轍哉矧新章之樂從樂其有利也若散循環而按年
再加以常捐是旣奪其可操之券而又竭其不涸之源
竊恐新商亦未必有人問津臣厯考淮南北報部課釐
自定新章迄今已逾五十萬兩以上循環章內載明犯

規者扣除隨時另招補數各商如有誤誤運不難立
時斥退利權仍操諸上非從前根窩悉皆網商把持可
比爲淮商圖經久之利在此爲鹺政籌不敝之規亦在
此藏富於

國不如藏富於商寬恤在一時正所以備緩急於異日謹
仿歷次籌捐成案勸令南北暨食岸各商湊集鉅資情
願共捐一次銀一百萬兩先繳見銀四十萬其餘六十
萬兩亦分岸定數由督銷各局按引核收隨時分批解
部仰懇

飭部全數實收免其常年輸納各該商世受

國恩不敢仰邀獎敘仍照章將所認引票永遠循環以裕餉需而保鹺局嗣於五月戶部議奏查該署督摺內所稱藏富於

國不如藏富於商寬恤在一時正所以備緩急於異日持論不無可取因查兩淮鹽法志載康熙乾隆暨嘉慶年間淮商迭因軍需待用捐助銀自數十萬至三四百萬不等節經欽奉

諭旨照數賞收此次兩淮各岸商公捐銀一百萬兩以佐籌備邊防要需義屬急公濟餉自未便阻其報効之忱合無仰懇

大恩俯如所請全數賞收仍懇

飭下兩江督臣轉飭兩淮運使迅將先繳之現銀四十萬兩
卽委妥員掃數解赴部庫交納下餘銀六十萬兩據稱
按引核收分批解部查從前兩淮捐助軍需均係分限
呈繳此次因籌辦邊防需餉視歷次較迫是以臣部奏
請預籌經費摺內聲明令各督撫趕緊定議限文到兩
箇月內覆奏原期早集鉅資爲有備無患之計所有兩
淮未繳捐銀若非預定期限誠恐各官商稍涉玩誤必
致緩不濟急因查近年兩淮冊報淮南歲銷約四十萬
引淮北歲銷二十九萬九千餘引合共七十萬引按引

分攤一百萬兩計每引應攤銀不過一兩四錢上下除
已交四十萬外下餘六十萬再按引勻攤每引實祇應
交銀八錢四分有奇眾擎易舉卽令尅期湊集亦尙非
強以所難臣等公同商酌應請以兩淮奉到此次部文
日起予限一年將未繳捐銀六十萬全數完交以資防
餉而清捐款又查該署督所請照章永遠循環以保饒
局一節原奏內瀝陳淮商捐輸自小邏堡而山東直隸
本省閩省山西河工災賑其捐過銀約二百十餘萬其
能如此踴躍者亦賴循環之法有以鼓勵其心若散循
環而按年再加以常捐是旣奪其可操之券又竭其不

湖之源恐新商亦無人問津等語查兩淮改票初章原定票運一年一運每年驗資掣簽先課後鹽立法甚善自改爲循環章程祇准舊商輪運新商概不得攪入夫新商之覬覦固在意中而舊商之把持實亦難免今該署督固請永遠循環以爲可保嵯局意在不願增商增引查南嵯以鄂岸爲大宗歲額應銷五十五萬九千餘引嗣後加斤減引計尙應銷三十七萬三千餘引上年兩淮運使開報各岸歷年銷數鄂省歲銷至多不過十三四萬引僅敷舊額三分之一然猶得諉云岸爲川佔未盡復淮也禁川復淮卹議自曾國藩厥後迭經御史

條陳江督額請而臣部深韙其說誠冀復舊制以開利源耳乃持之幾二十年每格於川楚各督臣之奏均以爲未可遽行以致迄無定章茲川督丁寶楨自抵川後卽將邊岸認真整頓著有成效本年二月開據奏此時若議復淮在川省已可照辦所慮惟鄂餉無著而淮商願包鄂餉早有成說業經具結送部諒不致有變更當經臣部議令江楚督臣妥速會商擇要設卡巡禁川鹽涓滴不准再侵楚境楚民不能淡食川絕則淮銷必暢此興復淮鹽之一大機會也惟裕課恤商計惟趁此時力圖規復以期銷路廣通將來多運多售卽無窮之利

在其中矣兩淮鹽務既改綱商爲票商將來全岸規復
自應增商增引以昭公允若商仍其舊引不增加以視
從前之根窩又何以異其把持殆有甚焉且臣部所以
爲淮南力爭楚岸者亦冀增淮銷以增淮課耳現時楚
南北合計祇銷二十餘萬引卽在無事時舊額亦不容
久虧矧值籌備邊儲需用正繁戰兵可計日凱旋防務
非一時所能藏事愈持久則餉需愈鉅若非從此增引
增課將何恃以備緩急之需應請

飭下兩江湖廣各督臣查照臣部本年四月奏案迅將禁川
復淮包餉設卡各事宜趕緊會商妥議章程專摺奏明

請

臣辦理又查該署督原奏內稱各該商不敢仰邀議敘一節臣等歷查淮南捐輸舊案均經各前任鹽政奏明不敢仰邀議敘其有由部酌予獎勵者皆係特奉

恩旨賞給非臣下所敢擅擬此次淮商公捐防費應否給獎之處統俟捐款繳齊後由臣部循照成案請

旨遵行總之商力不可不恤而商情尤不可不知該署督所稱淮商自聞按年捐款之議本重利微票價必落恐漸至一文不值又稱既奪其可操之券又竭其不涸之源竊恐新商亦未必有人問津固極言商力之不逮耳揆

之理勢當不其然又論者謂淮銷之滯固由引地之尙未全復而商私之沿途洒賣捏報淹消尤爲近來之大弊人言藉藉恐亦不盡無因其如何設法稽查嚴加懲儆之處應由兩江總督妥立專章認真整頓以期淮鹺日有起色

光緒六年六月署運司徐文達詳淮商報効捐銀一百萬兩前經酌定先繳四成其餘六成陸續繳候撥用詳奉批飭其餘六十萬兩當此邊防需餉孔殷勢難延緩亦應分岸酌定數目淮南由督銷局淮北由錢糧局按引核收以期迅速等因奉經飭據署海分司張運判稟請

將六成捐款分爲兩年呈繳以紓販力如奉部文催解
擬由卑庫設法籌墊並據淮南總局委員詳稱淮南鄂
岸請自輪售現開之丙子秋綱時扣起至戊寅春綱止
湘岸自輪售乙亥春綱時扣起至丙子秋綱止湘岸平
江自輪售庚辰春綱時扣起至辛巳秋綱止西岸自輪
售戊寅秋綱時扣起至辛巳春綱止皖岸南鹽自輪售
乙亥春綱時扣起至丙子秋綱止皖岸北鹽自輪售丙
子秋綱時扣起至丁丑秋綱止分綱核扣源源報解商
力得以稍紓伏乞轉詳核示各等情查款關邊防要需
各該商情殷報効自應迅速呈繳惟業已先繳四十萬

兩此項後六成銀兩若再責令速繳實屬力有未逮似
非稍寬時日不能培養淮北請分兩年呈繳委係萬不
獲已淮南各岸請分爲四綱六綱呈繳未免過遲署司
悉心酌核淮北六成捐銀擬請截至來年年底繳清淮
南鄂岸擬自現辦之丙子秋綱起至丁丑春綱止湘岸
自乙亥春綱起至乙亥秋綱止平江自庚辰春綱起至
庚辰秋綱止西岸自戊寅秋綱起至己卯秋綱止皖岸
南鹽自乙亥春綱起至乙亥秋綱止皖岸北鹽自丙子
春綱起至丙子秋綱止均於輪售鹽斤時由岸分綱核
扣約計淮北後六成銀兩繳清淮南亦相去不遠經鹽

政劉坤一批准

光緒六年十月運司王溥詳奉札據湖北督銷局稟遵限
核收六成報効銀兩擬飭商赴揚逕繳當批候札飭運
司妥議分期限繳章程趕緊詳辦等因又奉札據江西
督銷局稟西岸各商應繳六成捐款請飭駐揚各商就
近呈繳當批鄂商應繳後六成捐項已札司妥議分期
限繳西岸事同一例候札司彙案速議趕緊詳辦等因
正在核議間又奉批發鄂岸運商張同興等公稟遵飭
赴揚逕繳後六成捐款分期限繳一案併飭速議各到
司查此案先據鄂商張同興等在司具稟前情當以該

商等應繳後六成捐款請予分期限繳不必按綱逐票扣收尙係恪遵部限起見惟所稱自明年四五月先繳三成似屬太緩倘因防餉孔急待款接濟豈不有誤要需本司酌中核議應於年前先繳二成明年開春續繳二成五月以前全數繳清以期商力餉需二者兼顧方爲平允卽經批示並以西岸事同一律併案札飭淮南總局集商酌議詳候核轉茲據淮南總局稟稱所有鄂西兩岸各商應繳六成捐銀遵照札飭逕請分爲三限飭繳本年封篆前先繳二成明年三月二十日以前續繳二成五月二十日以前全數繳清逾限不繳扣票示

罰等情查該局所議分期繳完商力藉以展舒餉需不致遲誤卽核諸大部一年之限亦適允協似應准如所議辦理經鹽政劉坤一批准

光緒十年正月鹽政左宗棠奏竊臣欽奉

寄諭順天府府尹周家楣奏順天等省賑需亟須廣籌款項請飭令四岸舊票各商一律按票每引捐銀十兩以其半歸順天直隸以其半歸江蘇山東爲賑撫之需等語卽著酌度情形妥籌具奏等因欽此遵經札飭運司督商妥籌一面具片陳明俟覆到核奏在案茲據兩淮鹽運使孫翼謀稟稱分咨四岸督銷局飭傳鄂湘西皖四岸運商

皇太后

妥爲勸諭以每引捐銀十兩計之共應捐銀五百餘萬兩商力實有未逮懇請覆奏前來臣博采旁諮其中窒礙約有四端請爲

皇上縷晰陳之兩淮引票試辦時原不名一錢自循環定而始有票價從前轉相授受所值亦屬無多自清水潭捐後而票價始增直隸災賑等捐後而票價又增有票者居爲奇貨來淮者謂部章已定世業可圖或變易田產以集資或棄置絲茶而入局此攘彼奪票價遂增至萬餘金見在辦運之商多於此時入手淮局之更名易保

其姓名月日皆有冊卷可稽今欲報捐票本盈橐者已飄然長往方來者適重被其辜並有始而合夥繼則歸併名雖未更而票已易主礙難再輸票本一也說者謂該商等引票雖由價買而貨未歸公似亦近理不知創行票法係出示招徠彼時未索各商以萬金之價當事者亦未逆料今日之可抵萬金也上無禁令交相爲市者遂自爲增減溯厥由來無一非購自重價謂

朝廷未收萬餘金之捐該商等豈有異議謂淮商未出萬餘金之價該商等實具苦衷礙難再輸票本二也舊票歷年捐賑報效在鄂湘等岸綜計原祇三千餘金然西

岸實有出過四千餘金及五千餘金者不等在前卽有參差亦無非因時因地各制其宜譬之開荒之田例止升科而墾熟以後或一年易其主或數年而始易其主亦屬民間常事如以官田得值遂指價買熟田之戶爲無價之田復令再輸官價無此政體況該商等已去之資其價尤昂於新票而去歲所增皆歸併舊商承運仍是增引雖有先後之別承運實無新舊之分礙難再輸票本三也商賈之道以成本輕重爲盈虛目下該商等之票本已喫重稍失營謀卽有虞虧折儻更加捐票本則前之銖積寸累者一轉瞬皆化爲煙雲爲謀衣食轉

聖慈垂察奉

有皮栗衣

光緒十一年三月鹽政曾國荃奏接准部咨酌議開源節
流案內令淮南每引捐銀四錢淮北每引捐銀二錢作
爲每年永遠定額等因遵經飭據署兩淮運司程桓生
詳據淮南鄂湘西岸運商盧大昌等淮北票販鴻慶等
稟稱淮南於光緒八年加認新引復因新商無力承辦
仍由舊商繳捐分領引數增多積壓愈甚獲利愈微方
冀減釐裁費俾得積困稍舒若再按年加捐商力實有
未逮淮北亦於是年增復四十六萬引舊額新舊商同
時受困幾致一蹶不振見在新引雖奉裁減受病已深
驟難克實心餘力歉勉強遵行必致成本愈增轉輸不

繼續恐北鹺全局從此潰裂從前商本不足可向錢莊
通挪近則紛紛倒閉銀源枯窘本商辦運之資尙難籌
措加以捐項非特誤捐轉恐誤運察看商情殊未便強
以所難詳請覆奏前來臣查商情之向背全視獲利之
輕重同治初年原認票商獲利均厚嗣以捐款纍纍大
半輾轉價賣迭次更名目前承運之商無非湊集重貲
買票營運計算本利與初辦時迥乎不同前年順天府
尹周家楣以順天等省賑需孔急奏令淮南舊商按票
捐輸經左宗棠於十年正月臚陳窒礙四端困乏情形
早在

聖明洞鑒之中然周家楣所奏尙係籌捐一次已覺其難今
擬按年常捐是名爲籌捐不啻加賦商人更增疑慮兩
淮票價自八年南北增引後淮南日見其跌淮北更無
人顧問迨裁減新引始稍稍有問津者本年正月部文
到後又復驟然停頓有票者亟思脫票以免累挾貲者
亦多觀望而他圖向之視爲利藪者今皆視爲畏途旣
無以廣招徠且恐有誤課運兩淮課釐所入爲京協各
餉暨湘淮各軍命脈所繫大局攸關仰懇

聖慈俯念商艱勅部查照免其議捐以維商局奉
旨著照所請欽此

兩淮鹽法志卷一百四十九

欽定四庫全書

卷一百四十九

捐輸門 捐收票本

臣

兩淮鹽法志卷一百五十

雜紀門

祠宇

古蹟附

記曰法施於民則祀之以死勤事則祀之以勞定國則祀之三者祀典之大者也他若有舉莫廢佛寺道宮名勝之遺遊眺之所又都人士所樂觀厥成者歟況淮揚財賦之區禹筴富商於焉萃聚故倡捐興建者多兵燹以來崇飾宏麗日新月盛茲備載於篇凡非隲務助資者概略焉志祠宇

鹽宗廟二一在揚城南河下街康山旁一在泰州城內

同治元年運使喬松年以秦州明珠寺所奉明珠大帝
荒謬不經撤廢就其地改建鹽宗廟祀夙沙氏暨商大
夫膠鬲齊相管仲派僧住持司署月給香火銀三兩飯
食銀三兩在揚城者同治十二年眾商創建運使喬松
年新建秦州鹽宗廟記曰古聖人開美利之源以貽萬
世後人必有報祀之典以答其功下至販夫傭豎亦知
求其始事之人而奉祀之若酒則杜康茶則陸羽其類
甚夥細猶若此況其大乎鹽之資於人久矣江淮閒鹽
利尤饒上以佐國賦下以給民用凡官商胥吏士大夫
與市井纖夫仰給於斯者無慮數萬人顧未嘗求始事

之人而祠之無乃禮之闕歟按許叔重說文曰古者宿沙初作煮海鹽魯連子曰宿沙瞿子善煮鹽皆未言爲何時人世本謂夙沙作煮鹽而宋忠注乃目爲齊靈公時之夙沙衛此爲妄言衛能煮鹽何左傳國語史記無一語及之卽以齊鹽而論當舉管夷吾亦不當舉衛攷鄭夾漈通志引賈執英賢傳炎帝時候國夙沙氏羅泌路史注謂夙沙卽宿沙又作質沙炎帝之諸侯煮海爲鹽是世本之夙沙卽說文之宿沙固宜從路史注斷爲炎帝時諸侯無疑樂史寰宇記載解州安邑縣有鹽宗廟祀夙沙氏謂之鹽宗者尊之也是唐宋以來固已祀

於解池咸豐十年冬予領鹽運司事僑治海陵詢之諸
曹知千百年淮司未舉斯祀竊以爲疑古人於農則祀
后稷於蠶則祀西陵至今由之道光朝江蘇疆吏以宋
元閒黃姬教民蓺木棉有功疏請祀爲先棉

詔報可鹽之事重於木棉夙沙之傳與年尊於黃姬正當與后
稷西陵並隆終古顧閭寂無聞莫爲報禮豈非事之大
可憾者哉會兵警方急未暇經營至同治紀元羽檄稍
疏四境清謐偶過城西蘭若見所奉神不經遂去其像
而改祀夙沙氏以商賢大夫膠鬲齊相管夷吾爲配亦
如解州之廟題曰鹽宗龔在京師見官建泉神祠題曰

泉宗廟蓋取穆天子傳河宗之義以宗主爲解與尊之
之義可互相發明廟既新修寮案陳酒醴牲牢羅拜於
堂下僉以爲當於理屢於心行之晚而不可廢也方乾
嘉閒淮揚禹筴所入可富天下租賦之半官商上下皆
寬然有餘裕賢者館游士養食客賙無告之民否則治
園亭教歌舞嚴靡金錢無算至於琳宮梵宇亦踵華極
麗猥多而不可紀乃於鹽所自始者獨漠然不以動念
豈果思不及此耶抑考之未審而猶有所疑耶夫以
國家極盛時賢使者後先相望其力足以舉斯事而張大
之而卒無爲之者予強欲舉之而軍書雜運物力彫剋

僅僅得老屋數椽聊以行吾敬乃益歎時與人每不相
及凡不能乘時有所作爲者爲大可惜也祠南北各三
楹東西有廂然甚狹隘雖明禋已舉猶懼不足以安神
異日鹽綱復暢得有餘財當拓其堂廡增其丹牋庶稱
神靈之所依而滿奔走瞻拜者之意是在後之君子毋
失時矣

禹王廟在江都縣治浮山後又名浮山觀昔唐狄仁傑
毀吳楚淫祠惟存大禹廟宋嘉泰閒重修復圯

國朝康熙初復建雍正十一年選使尹會一乾隆五十七
年鹽政全德先後重修鄧漢儀浮山禹廟詩云淮海揚

州地難忘夏禹功四圍連蜃氣片石鎮蛟宮代改碑亭
肅年深廟貌崇應修禋祀禮不與醺壇同

謹按仙女廟鎮亦有禹王宮同治間增修

天儒祠祀漢大中大夫董子仲舒舊在運司堂後相傳
運司署爲董子相江都王故宅有井曰董井宣德中運
使何士英嘗加甃治而覆以亭復屋其旁以祀之大學
士楊士奇爲之記正統中運使嚴貞重修之翰林侍讀
金問有記正德閒運使畢璽以祠在司署神人雜處非
所以昭虔妥靈且往來登謁者不便乃請於御史朱冠
改祀於司右之正誼書院爲董子專祠吏部尙書喬宇

有記判官劉讓置田二十畝供祀事而問記於翰林修撰呂柟嘉靖九年御史朱廷立建碑十九年御史胡植檄運使李邦表嗣修刑科都給事中戚賢撰記

國朝康熙初運使朱之瑞捐貲重建方拱乾記之乾隆八年運使朱續賾贖舊址鄰屋一區以廣其宇十一年三十四年四十五年四十七年歷任鹽政運使相繼修葺嘉慶初年運使曾燠重修董子祠記曰揚州有董子祠其碑記始於明正統五年以董子嘗爲江都相又相傳其故宅爲今運使署因而祖祀之

國朝康熙三十五年兩次修建迺今祠所在也其本末皆

具前人所爲碑文中厯歲久遠漸就陲剝無以揭虔安
靈於是都人士請於官而鳩工以新之厯三月而訖事
請予爲文以落其成謹按董子爲漢醕儒劉向稱其有
王佐才今遺書尙存爲治春秋者家法其爲相雖無事
蹟可攷而以道義輔王當必有惠澤及民者列在祀典
固其宜也又豈以一宅之故爲鹽筴牢盆之所私哉予
昔官運使歲時享薦罔不震動恪恭起高山景行之慕
越十六年奉

命視嵯此郡而適逢此祠之新瞻仰楹桷肅奉牲醴雖媿不文
其可無言遂爲銘曰漢朝之儒首董賈雒陽少年尙其

亞夫惟先生蹈大雅琅琅三策通天人抗心三代醕乎
醕相諸侯王豈其屯誰開東閣求賢路斥棄鍾鼎寶康
瓠如發蒙耳職是故此郡先生昔常理藹然風流被江
汜經訓所涵蔚人士雲車風馬覽九垓披帷肅然先生
來千秋萬祀陳玉栢祠在運使署者咸豐三年粵匪折
毀同治八年重建公署十一年告成運使方濬頤於題
襟館外另闢一區以表醕儒高躅乃建屋六楹繚以曲
廊初北有董子井井之東又建九楹又於井之西浚池
畚土築高阜於九楹之南稍稍種竹樹焉光緒七年運
使洪汝奎復加修葺

吏忠正公祠二一在廣儲門梅花嶺墓右祀明大學士
督師史可法當忠正殉節揚州嗣子德威求遺骸不得
招魂葬衣冠於梅花嶺立碑識之雍正十二年督學禮
部侍郎張廷璐修築墓垣乾隆十年兩淮運使朱續暉
詳定春秋祀典三十三年運使鄭大進允裔孫開純請
建享堂三楹於墓前左右繞以土垣三十九年運使邊
廷掄增置門樓三間易垣以甃揚州知府謝啟昆撰墓
祠記四十一年

賜諡忠正四十二年六月侍郎彭元瑞以所得可法畫像及其
家書合卷進呈

上親題褒慰忠魂四字卷端並

製詩命廷臣賡和並命大學士于敏中書

御製書事一篇及可法復攝政王書於卷後裝發兩淮鹽政寅
著藏弄祠中寅著檄運使朱孝純於墓右展拓重建墓
鐫

御製詩文及畫像家書嵌石祠壁四十五年四十九年

聖駕南巡

特遣奠祭五十四年運使鹿荃捐置祭器六十年鹽政蘇楞額
允運使曾燠請復加修整一在大東門外姜家墩旁康
熙閒裔孫居揚守墓立祠奉木主以供俎豆乾隆十八

年運使吳嗣爵允裔孫山清請重修之三十一年運使
趙之璧四十五年運使倉聖裔五十八年運使曾煥相
繼修葺咸豐間二祠賊燬全圯同治九年鹽政曾國藩
閱兵道出淮南倡捐建修元和朱駿聲梅花嶺弔史忠
正詩云倉皇數語付家看兩字真難露鐵肝同室操戈
公等誤隻身扶鼎古來難園空斑竹淚何苦嶺占梅花
風尙酸自是天心須混一不教勝國得偏安

郝忠節公祠祀明湖廣房縣知縣贈太僕少卿郝景春
在城西法海橋畔景春前明萬厯壬子舉人知房縣事
流賊張獻忠陷城景春及其子鳴鸞僕陳宜同時殉難

諡忠節建祠歲祭以鳴鸞祈事載明史乾隆二十九年如皋姜忠基重修運使趙之璧捐廉助之四十二年運使朱孝純定給春秋二祭銀兩五十九年鹽政董椿允運使曾燠請以祠宇屬地方有司建造仍於鹽務捐助修費墓在甘泉縣金匱山道光十八年知揚州府李璋燾重修今圯

謹按景春殉難後葬房縣金匱山蓋衣冠墓也

曾襄愍公祠在三元巷曾家垣祀明嘉靖閒總制三邊贈兵部尚書曾銑嘉慶二年運使曾燠請於鹽政書魯重修並立碑記之文曰揚州三元巷舊有公祠歲久傾

圯公之裔孫某請余議修余爲上之巡鹽使者捐公貲
集事落成之日公裔孫乞余爲文以記之感公之事而
不能無言也夫國家之安危常繫於一二人之好惡事
功之成敗每爭於一二言之主奴無他權勢使然也權
在必爭則黨同伐異之見出勢有相角則挾私廢公之
事多端啟於大臣而禍流於庶職事壞於一代而論待
於千秋幾括甚微關捩非細可勝慨然然以余遐舊往
史歷考前賢立功者惟恃乎得君得君則南仲伐獫狁
亦賴乎有相有相則充國討先零道濟櫻朱武之疑始
不用於索虜岳侯犯秦檜之忌乃急召於朱仙未有主

上銳意以任之輔臣竭力以贊之而變故猝發戮辱驟
加者也公之請復河套也八議甫上而有壯猷之褒八
圖繼陳而有廓清之諭撫臣會奏不果則切責之本兵
覆議稍遲則請讓之而首輔夏言方且相倚爲功力主
其說廟謨英武不減漢明之取匈奴政府協同何異馮
唐之舉魏尙將使拂雲祠畔築受降之城敕勒川邊屯
屯田之尉公且望玉門而生入渡交河而洗兵復祖宗
百年之土疆息秦晉三邊之烽火不其偉歟何以君言
在耳朝令夕更朝局如棋前反後復司馬但知盡諾陳
官無故罹刑舉朝皆驚中旨莫測異矣哉人知嚴嵩他

曰之顯攻而不知世宗此時之先人也且夫開邊生事
在昔有之博望初歸李廣利興戎於宛馬烏孫新輯馮
子明矯制於莎車害豈切膚功眞黷武乃若河套之患
外連西海內構大同環衛旣頻有殺傷延安復屢遭蹂
躪豈可置邊氓於皮膜養外冠於門庭今取公前後奏
疏而觀之修築邊牆則周宣之城朔方也預備芻餉則
費誓之峙糗糧也選練士卒乃仲淹之閱州兵兼備舟
車乃王濬之營樓艦而竟徒揮神筆自壞長城得臣旣
誅晉文不憂於仄席廉頗已死秦襄何憚於窺兵迨延
甯之犯方張宣府之政更急而世宗云報復至此嚴嵩

謂起釁有由豈知壁忘鼠鼠不忘壁即使不議恢復能
晏然乎況乎言縱莫行罪不致死何以三字之獄不待
再聽而刑嗚呼嚴嵩此時徒以夏言故耳疾夏言則必
傾襄愍傾襄愍則必阻河套阻河套而淹答入淹答入
而明社危誰實爲之而以軍國之謀猷聽諸執政之好
惡哉噫詩刺青蠅書嗟黃髮有自來矣襄愍有墓在甘
泉縣金匱山隆慶中給事中章自修御史王好問疏其
冤賜祭葬

范文正公祠在平山堂右乾隆二年定給春秋二祭銀
兩十一年鹽政古慶允運使朱續暉請聽商捐修三十

五年五十六年相繼修葺五十九年暴風祠圯運使曾煥請於鹽政徵瑞於嘉慶二年重建咸豐開燬於賊同治九年運使方濬頤修復

歐陽文忠公祠在府城西北五里蜀崗平山堂後康熙初知府金鎮與鄉主事汪懋麟以舊宇爲僧久據爲棲靈寺前殿遂重建堂於寺右以復舊觀其西曰第五泉堂後構眞賞樓奉歐陽文忠並蘇文忠主於上二十三年四十四年

聖祖仁皇帝南巡皆有

御書雍正八年商人汪應庚重加修葺乾隆二年定給春秋二

祭銀兩十六年眾商重修

高宗純皇帝歷次

南巡皆有

天章及

御賜法物五十八年運使曾燠立石恭摹

御題歐陽修像於平山堂側壁間乃

尙方藏本也咸豐間粵匪竄郡城者三堂祠盡圯同治六年粵匪全殲九年兩淮鹽運使方濬頤重建其後運使歐陽正墉續修

雙忠祠在廣儲門外梅花嶺石坊猶存祀宋守揚州李

庭芝副統制姜才雍正十二年紳商馬曰琯修乾隆四十二年運使朱孝純修桐城姚鼐爲之碑記咸豐閒賊燬全圯同治十三年裔孫世職雲騎尉李新田稟請移於城內三祝菴橋官房改建

贊化宮在舊城前李府街宮本樂仙壇舊址道光四年鹽政曾燠改建贊化宮祀孚佑帝君正陽帝君皆沈香金像咸豐三年粵賊陷城神像未燬同治九年道士趙一峯稟請鹽運使方濬頤重修於後殿塑立金龍四大王神像十年於廟西購地建龍王殿祀行雨龍王神像及風師雨師諸神旱潦並祈禱於此曾燠贊化宮碑銘

曰贊化宮者揚州新建奉祀呂祖之所也呂祖自宋政和初顯著靈應詔封真人元代累加真君帝君之號祠宇遂徧天下我

國家崇報幽明凡有功德於民者皆列祀典嘉慶九年南河有大工繫惟呂祖之靈旣安旣固河臣列上其事

仁宗睿皇帝特加燮元贊運封號崇祀淮浦並詔各省原立廟宇一體奉祀呂祖之靈益顯著於海隅揚州屬邑類皆有呂祖專祠獨郡城向祇附祀於南門新城之文昌宮不獨不肅不稱

朝廷咸秩無文之義

皇帝建元之明年煥來視淮嵯展謁致敬俯仰興慨輒議改建
越二年乃與都轉運使張君青選郡守黃君在厚暨署
江都令萬君承紫甘泉令盧君雲亭捐金倡始度地構
屋距新橋不一里所有乾隆初河帥高公斌所建樂仙
壇故有呂祖像爲前使者高公恆所奉因卽其址鳩工
庀材擴其堂廡翼以奧阼棖題丹碧奐焉具舉以是歲
五月興工閏七月工竣嘗謂神仙之事其源出於道家
而支分派別乃有方術符籙之說然考自書契以來傳
記所載上古廣成赤松之流下及後代文士所述如許
旌陽陶隱居登真度世之士莫不根極性命原本忠孝

濟民利物陰翊王度固不僅以脫屣塵濁爲高長生久
視爲樂而一切俯視人世如蠛蠓蜉蝣不一動其心也
然功德之隆未有如呂祖者呂祖自唐迄今傳其遺迹
者多鉅公鴻儒言可徵信大抵以神仙之願力行聖賢
之博濟而非有方術符書之迂怪莊生所稱博大真人
者庶其近之

聖朝對越懷柔百神受職而世外高真默契夫下風問道之心
以宏施其禦災捍患之力上膺

睿鑑用節徽稱雲漢昭回光炳日月江淮人士所以沐

聖澤而迓神庥者皆於是乎在於以齋莊志氣昭報肸鬯誰曰

不宜煥以非才再涖此土敬勒貞石告事之成俾後來者永永無怠乃係以銘曰

聖人御宇奠八極海若河祇各率職崆峒仙駕世雖隔能以神功佐

帝力於維仙靈著在昔佑我

昌期底厥績真靈位業自

大錫江淮萬姓宅爾宅神人之功妙無迹金璫玉佩光胥飾鈞
天帝所來下國迢然眷此閼宮恤報祀千春庶無斁
旌忠廟在三元巷東祀宋死節臣左軍統制魏俊後軍
統制王方明太祖嘗夢俊方助國詔立廟有司致祀

國朝康熙閒鹽政曹寅重修秀水朱熹尊撰碑文曰旌忠
廟建自宋隆興二年以祀左軍統制魏侯俊後軍統制
王侯方兩侯均死於戰者也紹興三十一年金湯主渝
盟括三十二總管之師合蕃漢步騎二十七萬自將以
南舩舩舩分據津隘直趨維揚宋之猛將爲張俊秦
檜誅鉏殆盡恃以扞牧圉僅存病篤之劉錡爾乃用金
字牌徹之甘以半壁天下九百萬金錢委之葉義問一
懦夫奪錡招討印授之李橫此諸軍解體而不敢言者
當其時王權旣敗韓林楊抗龔壽陸廉崔邦弼趙不悔
先後棄城遁兩侯非不知主客之兵難以相當顧目擊

大帥輒憐措置失宜捐沙爲溝圍以鹿角潮回漂去一時傳爲笑端勢且日蹙甯奮一戰以拙速勝持久之兵斯亦前事之所有志未遂並喪其元蓋首雖離心不惡也幸而采石之捷事定策功贈魏侯中衛大夫邕州觀察使王侯拱衛大夫蘄州防禦使立廟故里祀之一堂繪部曲於廡左右記所云以死勤事則祀之者歟相傳神嘗感夢於明孝陵故載諸祀典歲以三月三日致祭歷年久遠廟圯不治今通政使司巡視兩淮鹽課監察御史曹公謁廟下語守者曰斯境內之神吾民祈報於是旌忠故典修舉不可緩也廼稽謀於眾攻金攻木給

以餽廩取陳丹暗粉以新之屬其友秀水朱葵尊攷兩
侯之遺事撰碑文勒諸石兼作歌以侑神焉辭曰迎神
兮丹衢新廟兮故都維暮之春兮月出之初神之樹兮
庭隅靈之拂兮舒舒將朋酒兮兩踰神來格兮樂胥覲
前兮巫後折山花兮盈手紛傳芭兮翔走神之留兮不
留縛車船於廟口送神兮柳林王侯毅魄兮載浮載沈
送神兮湖中魏侯死所兮無怨無恫小朝廷兮不武國
無人兮禦侮持弱荷兮作柱客爲狸兮主鼠罷揮戈兮
殷弩第鳴金兮息鼓左軍後軍兮戰獨鏢千夫一志兮
不可撓誕先登兮伐蘂爲國殤兮亦足以豪生不封侯

兮死當廟食稽故典於祠官兮享祀不忒嘉慶十二年
儀徵阮元復修

梵覺寺在揚州東關內皮市街寺原名興教康熙閒

賜名梵覺粵寇陷揚州此寺獨存其後燬於火同治六年淮商
助資重修

曾文正公祠二一在揚城南河下街康山旁同治十二
年鹽政何璟據淮南北商販捐貲籲請建祠奏曰前督
臣曾國藩於上年二月因病出缺經各省奏請建立專
祠均荷

聖恩允准又於同治十一年五月初六日奉

上諭此外立功省分並著准其一體建祠仰見

皇上眷念盡臣節終之典有加無已凡在臣工同深欽感曾國
藩歷年戰功播聞中外其任兩江總督前後十年之久
政績亦多可傳而於兩淮鹽務苦心整頓成效尤著感
人尤深蓋自兵燹以後淮南運道梗阻引岸廢弛商逃
竄困幾於片引不行淮北亦疊擾票法全壞加以軍營
提鹽充餉勢如亂絲曾國藩於同治二年將南北兩漕
次第整理三年正月奏定淮南新章八月奏定淮北新
章以運商運鹽到岸弊在爭售則立督銷總局以整輪
規場商收鹽入垣弊在搶跌則立售鹽總棧以保鹽價

而大要尤在明於用人凡設一局卡必求廉正練達之
員不拘資格推心倚畀一主唐臣劉晏任用士人之意
故能同心相助無弊不剔無利不興新章開辦不及一
年遠近商販趨之若鶩利厚則商聚商聚則課充計自
同治三年起至九年十二月止前後七年之閒淮南北
共收鹽課鹽釐銀二千萬兩以外又收鹽釐錢七百萬
串以外均分上下半年奏報有案湘淮各軍轉戰數省
削平巨寇而軍餉不致缺乏者半皆取資於兩淮課釐
曾國藩又以淮南引地爲

國家大綱所繫七年九月十年三月兩次奏禁川私雖一

時未能全堵而爲南商廣籌銷路不遺餘力至淮北開
綱驗資易啟賣號漁利之弊曾國藩與前督臣馬新貽
商議奏停驗貲令票販循環轉運至今稱便各商販追
念舊德歷久不忘同沾樂利之休冀圖馨香之報情願
集資在於揚州城內建立專祠見已購定地基稟經兩
淮鹽運使方濬頤詳請具奏前來臣查揚州爲鹽商輻
輳之區近數年來各商遵章辦運財賦重地漸復舊規
皆由曾國藩所定鹽章法良意美商販聞風爭趨納課
旣充獲利甚溥此次公籲建祠委實出於至誠合無仰
懇

天恩俯准淮南北商販在於揚州建立曾國藩專祠每年春秋

二季由運司率同官商致祭以隆食報而順商情奉

硃批著照所請欽此一在清河西壩光緒十二年鹽政曾國荃

據淮北票販以淮分南北相距綦遙每當春秋致祭販
等道遠事多不克躬襄執事以致名重報功之典實疏
展拜之儀復行籌款在於票販薈萃之西壩地方分建
專祠奏奉

恩旨允准

謹按淮北商販前捐集三千兩匯交淮南建祠揚州
今復集資三千五百六十餘兩建祠西壩於十二年

十月落成

景賢樓在鹽運使公廨樓祀明運副楊節愍公乾隆四十八年運使倉聖裔建樓鹽政伊齡阿署名李兆洛景賢樓記曰揚州鹽運使公廨隙地甚曠相傳包漢江都王相董子仲舒故宅而爲之有井曰董子井明初運使何士英亭其井建董子祠於前自後屢有遷移大抵皆在旁近記具州志年久而圯隆慶初運使徐衍祚渫其井新其祠榜之曰慎德書院碑尙在井上明季楊節愍公振熙官運副史忠正公開閫揚州奏擢都轉留共守忠正殉城死節愍從焉其家口男女十數皆赴董子井

以死亂定人無汲飲者爲之葬其上如隴後遂訛爲蒼子衣冠冢構屋以祠置神位於冢巔

國朝乾隆四十八年運使倉聖裔以形家言解右地空閒氣散則財不聚乃建堂又巍樓五楹兩淮鹽政伊齡阿題其樓曰景賢以適當祠前故也有記勒石堂中祠故有畫象曰董子象移象於樓而祀之道光二年運使錢寶甫見所畫緋袍而鶴補乃明時衣冠以爲當是節愍遺象乃旁稽志乘以樓祀節愍而爲之記勒石題襟館前而董子祠如故道光十七年姚君瑩以廉慎綜練權運使事謁祠下訝其神位安置非所因移位於中發其

幕而井見寒泉泓然然後知義魄所在不敢褻視而爲此也因移祠堂稍前空其屋爲井闌樹碣焉節愍之象持之有據從死之節又昭然著見則節愍祀於斯樓宜矣而井復爲井去其訛存其實董子之祠亦復於古夫英靈之氣烈蒿昭明久而必發而祀典所舉習爽晦昧或疑於其義必有人焉以其祇肅純懋之誼穆熙端懿之神爲迎而存之釐而秩之而後鬱者以宣疑者以晰茲祠茲樓茲井至今日而始昭燭爛朗者固因乎其時抑亦幸遇乎其人也記之以詔來者

張孝女祠在揚城新柏街西節孝祠後今圯昔兩淮運

使曾侯爲碑文云夫側陋之賢其迹易晦純至之行爲
天所哀是故荆棺號峽一女子之氏族無聞梅根作治
二十里之江流終在儀徵張孝女巧姑者里閭所不表
邑乘所不書以今年戊午仲春工浚揚子之津土出曹
娥之石古文不滅軼事如新問其高年證其實行蓋天
實爲之焉孝女姓標於星宿名乞於天孫無向日之萱
花有病風之椿樹雁行遠散烏口獨傷歲在甲子年方
十四鄰人不戒於火孝女驚社鳥之鳴有池魚之害人
或呼之使出彼不忍於獨生方欲竊負而逃竟以蹈仁
而死火旣熄鄰人啟焦土視之父屍猶壓女背也嗟乎

劉殷卬殯猶幸反風余丙投身亦逢暴雨乃白髮紅顏
之同盡何女丁婦壬之不仁撥朽骨於灰中誰其葬者
附親塋於地下還似生時嗟乎大道之衰名教偶存於
閭秀天性之薄真誠不喪於童年彼親在遠遊獨非人
子此孝思維則兼代阿兄唐李白詩云十子若不孝不
如一女英信矣龐娥親之烈行叔先雄之苦心屬在寒
微幾於湮沒事隔五十餘載今始上於有司而立廟焉
漆室之女來過從此見女貞之木絲上之田未有且當
禁寒食之煙爰勒豐碑庶彰潛德又繫詩云綽楔不標
孝女閭里乘不登孝女傳孝女之碑又埋沒文章安得

有黃絹真州昨者治渠堰剗出城南石一片大書赴火
張巧姑此石乾隆甲子建今年嘉慶歲戊午事隔春秋
五十五巧姑之廬久焦土巧姑骨在土中腐惟有區區
孺子心黃泉猶得依其父此碑旣出人始知千古不傳
知幾許巧姑時甫十四齡豈曾習禮兼明經入冶便如
金可鍊伏屍終恨雨無靈官司亟爲請旌錄更與江干
立祠屋歲時當祝孝女神親在之家不回祿
天甯寺在拱宸門外舊爲晉太傅謝安別墅義熙間梵
僧譯華嚴經於此褚叔度請於謝瑗度捨爲寺名謝司
空寺宋政和開改今名康熙二十三年至四十六年

聖祖仁皇帝六次

南巡

賜詩章聯額法物雍正十三年

世宗憲皇帝

賜上諭手卷法物乾隆十六年

高宗純皇帝南巡

御賜詩章聯額二十一年商人於寺右恭建

行殿自此

駐蹕歷

賜宸翰法物四十五年於大觀堂旁建

御書樓恭儲圖書集成是年

車駕臨幸賜名文匯閣並

御製文匯閣詩發四庫全書儲閣中五十五年運使鹿荃請於
鹽政全德重修伽藍殿天王殿嘉慶二年鹽政徵瑞允
運使曾燠請修萬佛三層二樓及配殿寮房廊舍六年
運使曾燠請於鹽政書魯重修九年鹽政佶山又修咸
豐三年粵賊竄揚僧悟鑑觸賊死寺焚燬四年僧真修
稍稍募造同治十年鹽政曾國藩倡捐屬運司方濬頤
勸商助資重建濬頤撰碑文曰揚州拱宸門外有天甯
寺焉宅傳太傅之遺名誌司空之舊古刹夙標於螢苑

異聞或託於龍宮池有青蓮出青衣而執役園留銀杏
闢銀界而棲禪湖唐代之金輪稱爲證聖迨宋朝之玉
敕易以報恩定名寶肇自祥符歷劫重興於洪武類皆
於挂衲繙經之地寓瞻雲就日之思義匪自今事沿在
昔欽惟我

國家期隆三古運邁百王乾符則

歷聖相承泰筴則

累朝遞授

聖祖仁皇帝翠華問俗頻觀龍馬之圖

高宗純皇帝黃屋省方屢展崆峒之駕凡先後六巡之盛典實

東南萬姓所歡迎良由勝占地靈仰邀

宸賞前既乘輿疊幸繼兼

行館旁通竊嘗忝溯

璇題謹稽

瑤翰法鼓聽魚龍之聚禪心契水月之澄春日長時株林照耀
好風吹處碧潏潏迴龕雲見其吉祥瓶花資其功德法
輪駐其多寶華蓋凝其眾香阿閣三層表名區於蜀阜
禪枝百代傳妙諦於南天而且地有吟軒天開畫鏡笙
簧成爲仙籟錦繡入乎化工商鼎周彝聚奇珍之典重
花香鳥語遍生意之昭蘇收煙景於軒窗清嘉意適聽

謳歌於閭里樂愷聲傳洵稱最古花宮上層蓮界追企
天章之煥采足令佛宇之增輝若夫

御府頒珍

內廷賜冊墨帖擬太清揚出梵經從羅什繙來名畫法書
弄前人之真蹟金章玉質分寶藏之奇觀福字則證夫
九疇佛像則圓夫十行增光明於般若極富貴於華嚴
是又挂帶山門方茲爲陋布金園地比此非多共以
行宮之鄰其西也凡祝

聖釐賀正旦官商咸集於斯蓋溫洛表巡方之館成紀傳敷教
之臺合下邇車允虔舉拜自粵氛倡亂江表驛騷蚩尤

抗涿鹿之師鑿齒逆伊祈之命揚城不守寺亦燬焉時
也衝飄蕩岳烈火焚山醉象成羣趁海潮而蹴踏毒龍
結陣驅江霧以縱橫遂使金鳳連豐全歸瓦礫玉蚪接
棟盡墜荆蕪迨夫薇芑遄征萑苻失勢軍五步而五伐
境三絕而三通可知福地莊嚴非揭竿所能據也靈巖
名勝非深人所可憑也鎖鑰旣固於北門星棊卽聯於
南國至

今天子踐祚五緯相計上動祥星九熬聚符下空妖霧翦除醜
類英定江淮光武旣漸來歸僧寮亦稍安輯而珍臺香
闕已非曩日之規玉榜金繩難語昔年之制良可慨也

濬頤忝司都轉移任維揚嘗躋殿址之巍崇儼近

天威於咫尺歲時茅蕝之禮悉仍其前隱微葵藿之忱彌給於
內乃就寺之舊址重建大殿暨兩廊朝房官廨外並建
金剛殿一切丹堊垣墉毋不加意脩飾至於供張

寶座安設

御屏凡有應需罔敢不備貲則命商以籌之工則擇官以督
之所以展私敬肅羣情也夫以揚之古蹟而論廳有芍
藥之名園有櫻桃之號墅有芙蓉之額閣有梧桐之稱
以及琴室吹臺風亭月觀鬪雞戲馬不少勝區蟲雲摘
星尤多傑構新泉煮茗則春貢留亭幽徑踏沙則秋聲

題館莫不動行人之感觸生過客之流連而惟此紺宇
豈幾琳宮摩詰寶繫循牆之慕難忘拜

闕之箴今者八會窮源重開舍衛三明極地再演迦陵聆
梵唄於牆東依然香界聽鳥聲於樹杪仍是禪音借爲
宸極之瞻兼作

奎文之湖從此瑤函玉簡聚宇宙之祥暉寶網珠幢近天人之
勝願法雲遠蔭卽

湛露濃敷佛日長明卽

皇風永暢十洲澄鏡八紘靜塵垂髻戴白之倫共登極樂西賚
南琛之屬大會無遮喜氣洽於寰中威靈震於遐外況

斯寺爲東山舊業洞庭古居淝水凱歌化兵形於草木
錢塘武樂演陣勢於雷霆賓迦所以潛蹤修羅於焉匿
迹但宏願力具足神通是則獅吼座前能助珠囊之珍
祕龍降鉢底益成玉燭之和甘不尤爲臣民之所祈祝
者哉光緒初鹽政劉坤一又捐廉重修

重甯寺在天甯寺後太平崗秋望故址爲郡城八景之
一或曰東嶽廟舊址有阜名太山者是也乾隆四十七
年甯淮商人於此建寺四十八年

賜額三叉

御製碑記並

賜詩章法物嘉慶六年

毀於粵賊今未修復

高旻寺在城南三汊河西岸有塔曰天中康熙三十八年

聖祖仁皇帝

賜御書四十二年淮南商恭建

行殿

翠華臨幸

賜御書扁復撤

大內所供金佛遣學士高士奇等齎送於寺四十四年四十六

年先後疊

賜詩文法物雍正八年畝商重修九年置田收其歲入資香火
十一年修其塔及十五樓五雲樓

高宗純皇帝六次南巡駐蹕

賜詩章聯扁法物嘉慶六年運使曾燠請於鹽政書魯重修碑
亭前後殿及寶塔照壁同治間紳商捐資修葺

化城寺在瓜洲鎮江岸原名息浪菴康熙四十二年

敕改今名三十八年至四十四年

聖祖仁皇帝南巡歷

賜詩章聯扁法物嘉慶七年前後殿宇各佛像運使曾燠請於

鹽政佶山皆葺新之

法淨寺古棲靈寺一名大明寺又稱西寺在揚城西北五里蜀岡上舊有浮圖九級見於大觀圖經隋仁壽元年以誕辰詔海內清淨處立塔三十所此其一也宋景德中僧可政復募建塔七級郡守王化基聞於朝賜名普惠旣而塔寺俱圯明萬厯間郡守吳秀卽故址建寺崇禎間御史楊仁愿修之

國朝康熙四十四年

聖祖仁皇帝南巡

賜扁及法物雍正間商人汪應庚重修

世宗憲皇帝賜聯乾隆十六年

高宗純皇帝臨幸賜聯扁三十年

賜名法淨自後歷次

南巡皆

賜詩聯法物金壇蔣衡大書秦少游句淮東第一觀五字刻石
門外又於寺東建雲蓋堂爲藏經閣堂卽棲靈寺塔基
也嘉慶元年地藏殿燬於火鹽政徵瑞允運使曾燠請
重修咸豐三年經兵燹全圯同治十一年運使方濬頤
重建

小金山在揚州北城外寺塑佛數尊兵燹後全圯同治

九年運使方濬頤重修

平山堂在北城外咸豐間粵匪疊竄揚州堂盡圯同治六年賊平九年運使方濬頤重建

谷林堂舊在佛殿後同治九年運使方濬頤移建於平山堂後

謹按堂後舊有樓五楹名眞賞樓樓前有玉蘭一株高出樓表一枝迤階下陰可半畝說者以爲歐陽文忠公手植樓與樹俱燬於賊今就隙地移堂於此洛春堂同治十一年運使方濬頤重建法淨寺左平遠樓亦同時建

治春詩社舊在虹橋西岸治春園內久圯同治九年運使方濬頤移建長春橋旁課桑局後

仙女廟在江都東關外離城十八里鎮市相傳祀杜仙康仙咸豐八年粵賊竄至萬福橋一帶搭造浮橋意欲東渡是晚雷雨大作淹斃逆賊無數遙見隔岸燈火絡繹隱有仙女神像驚疑而止平日水旱不時及鹽船經過祈禱輒應紳商呈請奏請

敕封同治十年十二月奉

旨杜仙加靈感二字康仙加廣庇二字

露筋祠在甘泉邵伯鎮北三十里官河西岸事見列女

傳祠基窪下枕湖面河每逢秋漲常被衝塌屢建屢圯
康熙二十六年知府傅澤感夢重修四十六年

聖祖仁皇帝南巡

賜節媛芳躅額運使李斯佺重建乾隆四十五年四十九年兩

次

聖駕南巡俱兩淮商修光緒十年商捐再修

謹按唐段成氏酉陽雜俎云江淮間有驛俗呼露筋
嘗有人醉止其處夜爲白鳥所嘜筋露而死又江德
藻北道記云自邵伯埭三十六里至鹿筋梁此處足
白鳥故老云有鹿過此一夕爲蚊所食至曉筋見因

以爲名諸說不一亦有作路經解者要當以米芾碑
記爲正所謂澤國之女嚼膚露筋不就有幃之子者
是也然前人皆莫考其姓氏獨明徐渭蕭荷花詞詩
自注卽俗稱露筋孃未知何據

五龍祠在高郵州治北二十里清水潭上同治五年清
水潭漫工堵合署鹽運使丁日昌知府程國熙以神靈
顯應稟請修復廟宇鹽政李鴻章漕督張之萬奏請奉
旨頒發德普安流匾額

龍神祠在寶應縣南三十五里運河西岸乾隆二十六
年建歷次

翠華臨幸俱兩淮商捐修葺嘉慶六年鹽政書魯允運使曾燠
請重修

湖神廟在寶應縣南運河西岸乾隆三十年建四十五年四十九年兩次

南巡淮商先後修葺嘉慶六年運使曾燠請於鹽政書魯重修
三賢祠在東臺縣城光緒十二年泰州分司沈桂重修
龍王廟在東臺南門外光緒十七年泰州分司沈桂重
建

劉猛將軍廟在東臺縣城光緒十七年泰州分司沈桂
重修

惠濟祠舊名鐵鼓寺在淮安府清河縣西二十里祠臨大隄中祀天后明正德二年建嘉靖間易名惠濟福河濟運孚應若響祠前黃淮合流地當阨要乾隆十六年翠華臨幸

詔諭兩淮鹽政吉慶淮關監督普福同修歷次

南巡

御賜聯額詩章珍寶法物嘉慶三年鹽政徵瑞修八年運使曾燠請於鹽政佶山又重修

謹按光緒丙子清河縣志明嘉靖中祠祀太山之神本朝卽其舊宇崇祀天后遂稱天妃廟乾隆中復改稱惠

濟祠

慈雲寺在清江浦建於明初

國朝雍正十二年奉

世宗憲皇帝諭旨撥淮關帑銀照大叢林修建乾隆四十五年
高宗純皇帝南巡鹽政伊齡阿修四十九年兩淮商修厯次
鑾輅時巡

賜有法物嘉慶三年運使曾燠請於鹽政徵瑞重修河庫道宣
世壽有記光緒初復修葺

龍王廟在海州板浦場光緒十二年商民捐資重修鹽
政曾國荃入奏奉

旨頒給蒲堰昭仁四字匾額

恭載

上諭一道

德音

陶文毅公祠在海州板浦場道光十九年奉

敕建

恭載

上諭一道

光緒元年鹽政劉坤一奏准已故海州

分司運判沈炳附祀四年鹽政沈葆楨奏准已故海州
分司運判童濂附祀

江天寺在鎮江府城西北揚子江中金山自城至山五
里脈接長山迤邐爲五州山至下鼻浦入江突爲此山
寺在山西麓舊名澤心不知所始或曰始於東晉宋祥
符圖經又謂起於唐之裴頭陀天禧五年改名龍游政
和四年改爲神霄玉清萬壽宮尋復名龍游寺當南北

往來之衝左臨京口右控瓜州峯巒臺榭巍若仙居

國朝康熙二十三年

聖祖仁皇帝南巡御書江天一覽二十五年

敕賜爲江天寺乾隆十六年商人恭建

行宮四十五年建

御書樓恭儲圖書集成是年

鑾輅時巡

賜名文宗閣頒四庫全書其中歷次

御書詩文聯額上方珍玩乾隆五十七年運使鹿荃請於鹽政

全德重修操江樓嘉慶元年五年歷修照壁大殿七年

鹽政信山允運使曾煥請重修慈壽塔光緒十年淮商捐萬金增修

定慧寺古本名普濟寺在鎮江府城東北揚子江中焦山山距城九里距金山十五里漢處士焦先隱此因名焦山寺初自東漢興平閒宋易名普濟菴尋復名寺元又易名焦山寺翠壁直上數千仞下皆盤根巨石屹立猗獮自瘞鶴銘外如唐人書四句偈宋元人題名徧於山麓

國朝康熙三十八年

聖祖仁皇帝賜今名乾隆二十六年兩淮商人建造

行宮

聖祖仁皇帝

高宗純皇帝歷次

南巡

賜天章御書法物嘉慶五年運使曾燠請於鹽政書魯重修大
殿七年請於鹽政佶山重修碑亭同治閒淮商助資修
葺

甘王廟在湖北興國州富池口光緒五年知州李翰請
重修鄂岸督銷局助銀二百兩由商捐項下撥領

謹按甘王字興霸見三國志仕吳拜西陵太守領陽

新下雉兩縣後拜北衙將軍卒葬富池趙宋晉封昭
毅武惠遺愛靈顯王載在州志相傳王中流矢歿忠
精靈應羣雅繞尸嗚嗚如悲泣狀故至今雅亦稱神
興國漕倉建修斯地鄂州鹽艘灣泊廟前均蒙神佑
地方每遇災眚士民祈禱皆應

曾文正公祠在湖南省城同治十一年建湘岸淮商每
票捐銀十二兩作爲春秋祭祀及祠中歲修經費

謹按祠東建鹽務公所西建思賢講舍共用四萬餘
金湖南巡撫王文韶爲碑文記之

南嶽廟在湖南衡州府境光緒八年修建湘紳李元度

總其事商民籌款八萬九千餘緡工竣短四千餘金由
湘岸票商攤捐彌補

兩淮鹽法志卷一百五十